

In de Sunn unne omm Moo

Wie merr die vorsch Woch unne omm Moo in de Sunn gesotze hawwe, de Schorsch un nisch, seet uff oomol de Schorsch: Ess iss joo immer widder schee, wens Mai werrd. Weil doo waaß merr, dass merr, wenn die Sunn scheine dut, Leit oilade kann, mett dene im Gadde sitze, dort Kaffee drinke un schee schwätze kann, dass die Veeschelscher singe un dass merr die Schwalwe un die Mauerseeschler iwver de Himmel flitze sieht.

Isch habben oogeguggd un nix gesaad.

Noch ooner Paus seeder: Awwer dess dut joo alles nimmi stimme. Isch habb jetzt nor dess gesaad, was merr die gonse John gesaad hawwe, awwer ess dut joo alles nimmi stimme.

Isch wusst wasser wollt, habb awwer immer noch nix gesaad.

De Schorsch donn, noochdem er uffs Wasser un nooch owwe geguggd hott: Wens Wedder schee iss wie heit fliesche die Fluuchzeuche iwver uns un merr kann koo Leit mieh oilade un mett dene im Gadde sitze un schwätze, aach singe un fliesche vunn dene kloone Veeschel immer wenscher. Dess oone hott villeischd nix meddem onnern ze due, awwer komisch isses schunn.

Isch habb geniggd un gesaad: Ess iss schunn e Kreiz mett dene Fluuchzeuche. Nodierlich kann merr nitt saache: Mieh Fluuchzeuche, wenscher Veeschel, awwer irschendwie, moon isch, deet alles zesommehänge, zumindestens hier bei uns un in onnern Ballungsgebiete. Weil wo die Mensche immer mieh Platz brauche ferr sich un ferr ihr Arwett un weil aach die Firme un die Stadtverwoldunge druff reagieren un immer mieh Heiser un Halle baue losse, iss immer wenscher Platz ferr die Veeschel doo. Recht hosde, seet de Schorsch, weils doch uff de onner Seit indressond iss, dass dort, wo vill Mensche ihr Stadt odder ihr Dorf verlasse hawwe, de Wald un alles drummerum immer wilder werrd, wo die Kraniche widder ihr Nest baue kenne, de Wolf hiekumme dut, de Luchs un die Wildkatz un aach de Biber.

Isch saach: All die Diern, die de ewe genend host, warn ausgestorwe bei uns. Un grad die Biber, habb isch jetzt gelese, derrfe ab un zu schunn widder geschosse werrn, weilse iwverhond nemme un vill Schade oorischde duen onn de Beem in de Näh vunn su emm Biberbau.

De Schorsch druff: Aach grüße Veeschel duts immer mieh gewwe, gugg emol die Störch, wie die widder in unserne Geeschend ze sehe sinn. Awwer aach die Reiher werrn mieh un die Ende un die Schwän. Die grüße Veeschel husche nitt wie die Omsele iwver die Strooß un werrn debei iwverfahn, un sinn nitt wie die Meisjer, die vunn de Katze, vunn dene ess aach immer mieh gewwe dut, gefresse werrn. Gons defoo abgeseh, dass die kloone Veeschel de erst emol vom Süde her bei uns ookumme misse un nitt unnerweeschs gefonge un gesse werrn.

Isch habb geniggd. Un weil bei uns die Nadur die Bach enunnergieht, fliesche immer mieh Leit doohie wo se moone, die Nadur wär noch in Ordnung, un weilse dort immer mieh werrn, geht aach dort su nooch un nooch die Nadur kabutt.

Mir hawwe donn de Ende un de Fluuchzeuche zugeguggd, nix mieh gesaad, weil mir unserne Gedonke noochgonge sinn, bis de Schorsch gemoont hott: Giehn merr enn Äbbelwoi drinke im Herrsch?

Mir egal, saach isch, mir kenne aach ins Joffche gieh.

Eiern Honnes